

As-tu 'té bouôn? par Amelia Perchard (ALP)

Quand j'ai 'té jouer auve mes anmîns,
Et qué j'r'arrive siez nous,
J'sai bein tch'est qu'Mémée s'en va m'dithe
Car ou m'lé dit tréjous;
As-tu 'té bouôn, coumme j't'avais dit,
T'es-tu bein comporté?
J'sai tréjous bein à tchi m'attendre
Quand j'm'en vais r'arriver!

Si j'vais siez Manman pour lé jour,
Quand j'rentre siez nous l'sé,
Les preunmiéthes patholes à Mémée:-
As-tu 'té bouôn aniet?
Si j'vais en ville, ou sus la grève,
N'importe iou qu'j'vais m'prom'ner -
Ch'est la même chose, As-tu 'té bouôn,
J'voudrais saver, di-mé?

J'en sis enn'yé, mon doue d'la vie!
Crait-alle qué j'sis méchant?
Et, si j'fais tchique pétit mînché,
Tch'est qu'y'éthait d'ravissant?
Mais j'aim'thais bein ouï tchique aut' chose
Quand j'entre dans la maïson -
Ch'n'est pas là eune tchestchion d'mander,
À mé, un grand garçon!

Go to the Jèrriais website to find the audio version of this...

www.jerriais.org.je

